

玉函山房目耕帖

目耕帖卷三十

歷城馬國翰竹吾甫

禮八

冬官考工記第六釋文鄭云此篇司空之官也司空
篇亡漢興購以千金不得此前世識其事者記錄
以備大數爾賈疏冬官一篇其亡已久有人尊集
舊典錄此三十工以爲考工記雖不知其人又不
知作於何日要知在嬴秦以前故遭秦滅焚典籍
韋氏裘氏等闕也此記雖不同周禮體例亦爲序

置首末相承

隋書經籍志漢時有李氏得周官上於河間獻王獨闕冬官一篇王購以千金不得遂取考工記合成六篇因學紀聞禮記正義云孝文時求得周官不見冬官一篇乃使博士作考工記以補之馬融云孝武開獻書之路周官出於山巖屋壁漢書謂河間獻王得之非孝文時也序錄云李氏上五篇失事官一篇取考工記補之六藝論云壁中得六篇誤矣齊文惠太子鎮雍州有盜發楚王冢獲竹簡

書青絲編簡廣數分長二尺有得十餘簡以示王僧虔僧虔曰是科斗書考工記周官所闕文也漢時科斗書已廢則考工記非博士所作也案賈疏又謂劉歆足成之亦非也

黃氏曰抄王次點曰以周官司空之掌攷之司空未可以爲亡也夫周官言司空掌邦土居四民時地利凡經言田萊溝洫室廬者非居民而何桑麻穀粟之所出山澤林麓之所生非地利而何意者簡編錯雜先儒莫之能辨遂以考工記補之其實司

空一官未亡也邱吉甫曰伯禹作司空平水土以
來至周官之書皆曰司空掌邦土豈得以任土地
之職歸之司徒職方氏形方氏山師川師邊師之
屬豈得歸之司馬大小行人之職豈得歸之秋官
似此之類頗多俞廷椿王次點皆以爲周官本不
亡錯見於五官中余細考之果未嘗亡也真西山
趙庸齋皆以次點之訂義有先儒所未發者余今
以五官之屬其本文列於前以俞王先所刪補者
參訂爲六官之屬書於後則周官三百六十粲然

在目而冬官之不亡信矣按吉甫又云宋淳熙間
臨川俞廷樁始著復古司空篇新安朱氏一見以
爲冬官不亡考索甚當鄭賈以來皆當斂衽退舍
嘉熙間永嘉王次點又作周官補遺由是周禮之
六官始得爲全書攷吉甫冬官補亡五十四大司
空小司空載師封人量人均人土均草人稻人山
虞林衡川衡澤虞非人角人羽人掌葛掌染草圉
人場人牧人牛人充人獸人廩人鼈人雞人犬人
獸醫司裘掌皮司服典絲典枲染人弁卽追師屨

人典瑞典同巾車典路車僕司常司弓矢橐人冢
人墓大夫職方氏土方氏彤方氏山師川師遽師
蓋合俞王兩家之說而損益之以成書篇首無闕
惟王建國至以爲民極二十字及乃立冬官司空
至邦國二十字大司空小司空之職二條仍闕元
吳澄周禮敘錄冬官雖闕以尙書周官考之司空
掌邦土而雜於地官司徒掌邦教之中今取其掌
邦土之官列於司空之後庶乎冬官不亡而考工
記別爲一卷附之後云按草廬所補又與俞王稍

異舒芬周禮定本多辨正之朱氏尊彝經義考云
臨川俞氏復古編謂司空之屬分寄於五官同安
邱氏暢其旨取五官所屬歸於冬官六屬適各得
六十著爲周禮定本蓋讀此而宛如全書焉繇漢
迄唐說經者義雖紛綸往往存其疑而不改逮宋
元諸君子生千載之後一旦釐正其文若朱子之
孝經大學蔡氏之武成金氏之洪範蔡氏之雜卦
傳吳氏之禮記及俞氏邱氏之周禮皆自信而不
惑後世學者莫敢議其非雖然無數君子之學識

苟好奇穿鑿則或失之僭或失之誣殆亦難乎免矣

官補亡三卷錢勰所撰據尚書大傳大小戴記春秋內外傳補亡凡二十有一曰司空曰后稷曰農正曰農師曰司商曰甸人曰火師曰水師曰舌人曰工人曰弁虞曰匠師則本諸國語曰寄曰象曰狄鞮曰譯則本諸王制曰野虞曰工師曰舟鮫則本諸月令曰工正曰圻人則本諸左氏傳不襲前人之言可謂溫故而知新者矣

或通四方之珍異以資之注故書資作齊杜子春云
齊爲資案攻金之工云金有六齊注目和金之品
數此齊字當依故書如字讀與六齊之齊同義杜
改經字非也

粵無鑄注鑄田器詩云侍乃錢鑄又云其鑄斯趙案
高承事物紀原周書曰神農時天雨粟帝種之作
鉏耨以墾草莽然後五穀興則鋤蓋神農所造也
詩曰痔乃錢鑄注鋤也世本曰倕作耨釋名曰鋤
類然則鑄耨卽鋤也翰又考爾雅釋器斲劂謂之

定李巡注鋤別名也張揖廣雅定謂之耨孟子雖有鎡基許慎說文解字鋤謂之鎡基顏師古急就篇注鋤去草之具一名鎡基又揚雄方言關東謂大鋤曰鹵斫是皆耨之異名

橘踰淮而北爲枳林希逸考工記圖解枳橘只是一種移橘於淮北則變而爲枳毛應龍集傳晏子云江南爲橘江北爲枳翰案淮南子
訓橘樹之江北化而爲橙則又不止爲枳矣

鵲不踰濟注春秋昭二十五年有鵲來巢傳曰

書所無也陸佃埤雅釋鳥南方又有鸛鵒者里兒
剔其舌端教以語言甚慧禽經曰鸛鵒剪其舌而
語是也舊說鸛鵒不踰濟又穴居故春秋更有鵒
鵒來巢以異書也案負暄錄南唐李主諱煜改鸛
鵒爲八哥今名鵒鵒爲八哥者始於此

貉踰汶則死注貉或爲援謂善緣木之援也汶水在
魯北困學紀聞貉踰汶則死先儒以汶爲魯之汶
水列子釋文云案史記汶與嶧同謂汶江也今江
邊人云狐不渡江說文貉狐類也踰越大水則傷

本性案浚儀本殷敬順說汶水甚確並可破貉或
爲獫之誤

妨胡之筈注妨胡胡子國在楚旁筈矢幹也故書筈
爲筈杜子春云當爲筈筈讀爲稟案筈作筈古文
假借字不必改讀爲稟也

凡攻木之工七攻金之工六攻皮之工五設色之工
五刮摩之工五搏埴之工二注故書七爲十刮爲
挽鄭司農云七當爲十挽讀爲刮刮磨之工蓋玉
工也案七之爲十簡編磨滅缺其下挑畫也挽當

如字集韻韻會並云挽戶管切擊也摩也鄭鏐解義謂先鄭以刮摩爲玉工義未賅雕人櫛人矢人不得謂之玉工也則作挽較刮字義長

攻皮之工函鮑鞞韋裘注鄭司農云鮑或爲鞞蒼頡篇有鞞鬻賈疏藝文志蒼頡七章李斯作鞞鬻篇有治皮之事故引以爲證又車人一宣有半謂之櫛一櫛有半謂之柯注引鄭司農云蒼頡篇有柯櫛賈疏並是柄也案蒼頡篇皆是四字斷句其書散佚諸所引者多單字或二字蓋出張揖訓詁郭

璞訓詰如顧野王玉篇引塊塊城上小垣廣韻入聲十九鐸酢字注引主答客曰酬客報主人曰酢史記匈奴列傳司馬貞索隱引靡者曰比麓者曰梳之類是二字爾雅釋文引瑗玉佩名文選注引薄微也茸草貌邈徐也餌食也之類皆單字引全句者惟禮記曲禮注引考妣延年說文解字序引幼子承詔神仙之術而已顏氏家訓書證篇引漢兼天下海內并厠豨黥韓覆畔討滅殘四語又是班固所續非李斯蒼頡篇正文此經先鄭兩引亦

二字非全句也秋官掌客車三秬注引鄭司農云
秬讀爲秬秬麻答畢氏沅序蒼頡篇補逸以秬秬
麻答四字當卽蒼頡篇之言蓋從此二引推而知
之也

刮摩之工玉櫛雕矢磬搏埴之工陶旒注故書雕或
爲舟埴或爲埴杜子春云舟非也案雕人今缺是
否未能定埴埴古今異字也

鄭注事官之屬六十此識其五材三十工畧記其事
耳其曰某人者以其事名官也其曰某氏者官有

世功若族有世業以氏名官者也賈疏三十工於六十爲不備記人錄者未必在六十屬之內直以數言之充得三十二而已案記首便云國有六職百工與居一焉似亦未可以工爲官也

陳傳良周禮說蒼萃車制名目爲一篇頗便於學者其有舛誤者

欽定周官義疏訂正之恭錄於此 夾車兩旁而圓轉者

曰輪輪之外輳而行地者曰牙

亦曰車輳關西曰輳

牙之中

直指奏轂者曰輻

亦曰輪輳

輻之所奏而貫輪利轉者